

UVODNA RIJEČ

Poštovani čitaoci,

Kada je 2003. godine štampan prvi broj Zbornika radova tada Islamske pedagoške akademije, vizija Uređivačkog kolegija i Redakcije Zbornika bila je da se Zbornik, kao glas nauke s ovog fakulteta, afirmira u univerzitetsku serijsku publikaciju prepoznatljivu po visokim kriterijima odabira radova, uređenu prema najsavremenijim standardima i indeksiranu u akademskim bazama podataka.

Danas, deset godina kasnije, kada Vam s ponosom predstavljamo deseti, jubilarni broj Zbornika, slobodno možemo kazati da smo u ovoj ambicioznoj nakani uspjeli. Uporedo s kontinuiranim rastom fakulteta i širenjem oblasti njegovog naučno-istraživačkog djelovanja, Zbornik je, sa svakim novim brojem i uz veliki trud njegovih glavnih aktera – autora, recenzenata, lektora, prevodilaca, tehničkog urednika – zadobijao na ukupnom kvalitetu što mu je omogućilo da sa uspjehom prođe zahtjevan proces licenciranja u EBSCO i CEEOL bazama podataka.

U desetom broju Zbornika radova Islamskog pedagoškog fakulteta predstavljamo dvadeset dva nova rada, koji su, prema ocjenama recenzenata, uglavnom svrstani u naučne radove i pripadaju oblastima vjerskih znanosti, islamske misli i civilizacije, socijalnih istraživanja i jezika i književnosti. Na temelju svojih opsežnih uvida u zadanu prolematiku i slijedeći savremene paradigme istraživanja, autori ovih radova – naši nastavnici i saradnici, naše kolege s drugih fakulteta i srodnih institucija, nesebično nas obogaćuju novim saznanjima u domenu ovih naučno-istraživačkih oblasti.

Nadamo se da će ostvareni rezultati istraživanja, kao i sama tematika radova, biti interesantni i od koristi za naše drage čitaoce, a svima onima koji su pomogli da slavimo deset godina postojanja našeg Zbornika, čestitamo ovaj jubilej i najiskrenije se zahvaljujemo.

Urednica:

Vanr. prof. dr. sc. Mejra Softić